

22 ოქტომბერს, ქალაქ თბილისის მუნიციპალიტეტის VII მოწვევის საკრებულოს წევრმა ნათია მოდებაძემ, მოსახლეობას მისი, როგორც პროპორციული წესით არჩეული წევრის მუშაობის ანგარიში წარუდგინა. საანგარიშო პერიოდი 01.12.2024-01.11.2025 წლებს მოიცავდა.

შეხვედრაზე საუბარი იყო საანგარიშო პერიოდში ყველა კომისიაში დასწრებისა და განხილული საკითხების სტატისტიკაზე, ასევე, მისი ჩართულობით გამართულ სხდომებსა და განხილულ საკითხებზე.

დეპუტატმა თქვა, რომ ჩართულია სამი კომისიის მუშაობაში, ესენია: განათლებისა და კულტურის კომისია, ჯანმრთელობის დაცვისა და სოციალური საკითხების კომისია, ქალაქ თბილისის მუნიციპალიტეტის მერთან არსებული თვითნებურად დაკავებულ მიწაზე საკუთრების უფლების აღიარების კომისია. ასევე, ის არის ფრაქცია „ქართული ოცნება-დემოკრატიული საქართველოს“ წევრი, საკრებულოს გენდერული თანასწორობის საბჭოსა და ეთნიკური უმცირესობების საკოორდინაციო საბჭოს წევრი.

მისი თქმით, საანგარიშო პერიოდში ჩატარდა საკრებულოს 16 სხდომა და დაესწრო ყველა სხდომას, რომელზეც მიღებული იქნა 103 დადგენილება და 742 განკარგულება.

ნათია მოდებაძემ განაცხადა, რომ საანგარიშო პერიოდში მისი ინიციატივით დაიწყო ისნის რაიონში, წინანდლის ქუჩაზე არსებული სკვერის რეაბილიტაცია, რომელიც უახლოეს თვეებში დასრულდება.

ანგარიშის წარდგენისას დეპუტატმა განსაკუთრებული ყურადღება გაამახვილა „ქალაქ თბილისის მუნიციპალიტეტის მერთან არსებული თვითნებურად დაკავებულ მიწაზე საკუთრების უფლების აღიარების კომისიის“ წევრად მუშაობის პროცესსა და პასუხისმგებლობაზე. თქვა, რომ დღემდე გამართული კომისიის 82 სხდომიდან, დაესწრო 68 სხდომას, მონაწილეობა მიიღო 3000-ზე მეტი საკითხის განხილვაში და განხილვისას მოუსმინა 2400-მდე მოქალაქეს.

ნათია მოდებაძემ პრეზენტაციის დიდი ნაწილი „ჯანმრთელობისა და სოციალური საკითხების“ კომისიაში მისი ჩართულობით მხარდაჭერილი საკითხების განხილვას დაუთმო.

ხაზი გაუსვა აღნიშნული მიმართულებით წლიურ ბიუჯეტს და თქვა, რომ ჯანმრთელობისა და სოციალური დაცვის მიმართულებით ბიუჯეტის 99%-ის ათვისება მოხდა, რაც კიდევ უკეთ მეტყველებს განხილული და დაფინანსებული საკითხების აქტუალობაზე.

მისი თქმით, აღნიშნულმა კომისიამ საანგარიშო პერიოდში ორგანიზება გაუწია 13 სხდომის ჩატარებას. დეპუტატის ჩართულობით ჩატარდა 13 კომისიის სხდომა.

მან ხაზი გაუსვა საანგარიშო პერიოდში განხილულ და ბიუჯეტით დამტკიცებული პროგრამების/ქვეპროგრამების ჩამონათვალში ახალ პროგრამებს, როგორიცაა:

- „რევმატოიდული ართრიტის სამკურნალო ბიოლოგიური პრეპარატების დაფინანსების ქვეპროგრამა“, რომელიც სოციალურად დაუცველი პირებისთვის (სარეიტინგო ქულა არ აღემატება 150-ს), უზრუნველყოფილია მედიკამენტების სრული, 100%-იანი დაფინანსება, ხოლო დანარჩენი ბენეფიციარებისთვის თბილისის მუნიციპალიტეტი უზრუნველყოფს მედიკამენტების ღირებულების 80%-იან თანადაფინანსებას.

- „100 წელს მიღწეულ მოქალაქეთათვის ერთჯერადი დახმარების“ ქვეპროგრამა. მოქმედი რედაქციის მიხედვით, 100 წელს მიღწეულ მოქალაქეთათვის ფულადი დახმარება განსაზღვრულ იყო 1000 (ათასი) ლარის ოდენობა, ხოლო წარმოდგენილი პროექტით, ფულადი დახმარება განისაზღვრება 10 000 (ათი ათასი) ლარით.
- და მესამე, ახალი სოციალური ქვეპროგრამა “ქალაქ თბილისის მუნიციპალიტეტში პერსონალური ასისტენტის მომსახურებით უზრუნველყოფის ქვეპროგრამის განხორციელების წესი“, რომლის მიღების მიზანია პერსონალური ასისტენტის საშუალებით, შეზღუდული შესაძლებლობების მქონე პირთა დამოუკიდებელი ცხოვრების და საზოგადოებაში ინტეგრაციის ხელშეწყობა, ვინაიდან, შეზღუდული შესაძლებლობების მქონე პირებისათვის ხელსაყრელი პროექტების შექმნა, სახელმწიფოს ერთ-ერთ მთავარ პრიორიტეტს წარმოადგენს.

ნათია მოდებამემ არნიშნა ისიც, რომ საანგარიშო პერიოდში აქტიურად მიმდინარეობდა გასულ წლებში მიღებული პროგრამების ბიუჯეტირებასთან დაკავშირებული ცვლილებები და მართვა, როგორიცაა:

- „სახსრების ენდოპროთეზირების დაფინანსების“ ქვეპროგრამის განხორციელების წესი“
- „დაავადებათა სკრინინგების“ პროგრამა;
- „გადამდებ და არაგადამდებ დაავადებათა ეპიდემიოლოგიური კონტროლის“ პროგრამა;
- „სახსრების ენდოპროთეზირების დაფინანსება“;
- „ტრანსპლანტაციის ქვეპროგრამის განხორციელების წესი“;
- „აუტიზმის სპექტრის დარღვევის მქონე ბავშვთა აბილიტაციის“ პროგრამა;
- „გაფანტული სკლეროზის სამკურნალო მედიკამენტების და კვლევების დაფინანსება“;
- „ძუძუს კიბოს სამკურნალო მედიკამენტების დაფინანსების“ ქვეპროგრამა;
- „ფსიქიკური ჯანმრთელობის სათემო მომსახურება“, მათ შორის მულტისისტემური ინტერვენცია 5-17 წლის ასაკის ბავშვებსა და მოზარდებში, და ასევე, აქტიური (ასერტული) ფსიქიატრიული მკურნალობა 18 წლის ასაკის ზემოთ მოზარდებში, რომელიც მოიცავს მსხვილ და მნიშვნელოვან სხვადასხვა კომპონენტს.

საკრებულოს წევრმა ინფორმაცია წარადგინა განათლებისა და კულტურის კომისიაში მისი საქმიანობის შესახებაც და აღნიშნა, რომ „განათლებისა და კულტურის“ კომისიის მიერ საანგარიშო პერიოდის განმავლობაში ჩატარებულ იქნა 13 სხდომა. მან თქვა, რომ საანგარიშო პერიოდში დაესწრო ყველა სხდომას და განიხილა 23 საკითხი.

საუბარი დაიწყო მუნიციპალიტეტის მიერ ბოლო პერიოდში განხორციელებული მერაბ კოსტავას მემორიალური სახლ-მუზეუმის სრული სარემონტო სარეაბილიტაციო სამუშაოების საკითხით და შეეხო ისეთ თემებსაც, როგორიცაა 2025 წლის პროგრამის ფარგლებში დაფინანსებული სტუდენტებისა და აქტივობების სტატისტიკა. მან მოსახლეობას უთხრა, რომ საანგარიშო პერიოდში თბილისის მუნიციპალიტეტის მერიის ბიუჯეტიდან სწავლა დაუფინანსდა:

- სოციალურად დაუცველი 1403 სტუდენტს;
- მრავალშვილიანი ოჯახის წევრი 675 სტუდენტს;
- შეზღუდული შესაძლებლობის სტატუსის მქონე 46 სტუდენტს;
- 410-მა წარმატებულმა მაგისტრანტმა მიიღო მერიის სტიპენდია.

ასევე ისაუბრა დაფინანსებული პროექტებისა და სხვა ღონისძიების რაოდენობებზე. კულტურის სფეროს განვითარების ხელშეწყობის ფარგლებში 250-ზე მეტი პროექტი დაფინანსდა. მათ შორის: 60 - მდე ფესტივალი და კონკურსი, 50 საიუბილეო და შემოქმედებითი საღამო, 70-მდე საგამოფენო, საგანმანათლებლო და შემოქმედებითი ღონისძიება. 140 საგამომცემლო, 60 აუდიოვიზუალური და ვიზუალური ხელოვნების, 50 დიზაინის და რეწვის მიმართულების, 50 მედია-ხელოვნების, 120 „ინკლუზიური ხელოვნებისა და განათლების ხელშეწყობის“ პროექტები.

„პროფესიული განათლების და დასაქმების ხელშეწყობის“ პროგრამის ფარგლებში დაფინანსდა 12 ორგანიზაცია და 80-მდე სპეციალობა.

მანვე თქვა, რომ საკრებულოს მიერ მხარდაჭერილი ბიუჯეტით, გაგრძელდა თბილისის რაიონის გამგეობების მიერ მოსახლეობის სამედიცინო გამოკვლევებისა და მკურნალობის თანადაფინანსება და ყველა ის პროგრამა და ქვეპროგრამა, რასაც გასულ წლებში მხარი დაუჭირა საკრებულომ.

ანგარიშის წარდგენას ესწრებოდნენ მოქალაქეები.